

WORD

"Sapagkat ang mayroon ay bibigyan pa ng mas marami, ngunit ang wala, kahit ang kaunting nasa kanya ay kukunin pa." MATEO 25:29

WHAT

Maraming tao, kahit mga Kristiyano, ay kung hindi nagkukulang ay lunod sa utang na hindi naman kailangan at nahahadlangan sila nito na gawin ang kalooban ng Diyos. Madalas ay resulta ito ng maling pamamahala ng pananalapi. Upang lutasin ito, kailangan nating matuto kung papaano ang mainam na pamamahala ng pananalapi. Tuklasin natin ang sinasabi ng Bibliya tungkol sa mainam na pamamahala ng ating mga ari-arian.

1 Lahat ay pinagkakatiwalaan ng Diyos ng sukat ng pananalapi.

¹⁴"Sinabi pa ni Jesus, "Ang paghahari ng Diyos ay maitutulad sa kwentong ito: May isang taong paalis at papunta sa malayong lugar. Kaya tinawag niya ang kanyang mga alipin at ipinagkatiwala sa kanila ang pera niya. ¹⁵Binigyan niya ang bawat isa ayon sa kani-kanilang kakayahang magnegosyo. Binigyan niya ang isa ng 5,000, ang isa naman ay 2,000, at sa isa pa ay 1,000. Pagkatapos, umalis na siya. MATEO 25:14,15 (BASAHIIN ANG BUONG KWENTO SA MATEO 25:14-30.)

Ipinagkakatiwala ng Diyos ang paglalaan sa mga tao katumbas ng kanilang kakayahang pamahalaan ito. Hindi mo man nakikita na magaling kang tagaingat ng pananalapi ngayon ngunit hindi pa huli ang lahat upang matuto ka. Magbigay ng mga halimbawa ng pagpapala na inihabilin ng Diyos sa iyo at kung papaano sa tingin mo na gusto Niyang pamahalaan mo ito.

2 Nalulugod ang Diyos kapag tapat tayo sa ating buhay pananalapi.

¹⁹"Pagkalipas ng mahabang panahon, bumalik ang amo nila at ipinatawag sila upang magbalita tungkol sa perang ipinagkatiwala sa kanila. ²⁰Lumapit ang alipin na nakatanggap ng 5,000 at sinabi, 'Heto po ang 5,000 na ibinigay n'yo sa akin at ang karagdagan ng 5,000 na tinubo ko.'" MATEO 25:19,20

Ang laki ng yaman natin ay hindi alintana sa Diyos kundi ang katapatan natin sa kung ano man ang mayroon tayo ang nakalulugod sa Kanya. Pinuri at ginantimpalaan ng Ama ang dalawang matapat na alipin sa pagsabing, "Halika't makibahagi sa aking kaligayahan!" Anong gantimpala ang maaasahan natin kapag naging matapat tayo sa mga inihabilin ng Diyos sa atin?

3 Ginagantimpalaan ng Diyos ang pagkamatapat sa pamamagitan ng pagtitiwala ng mas marami pa.

"Sumagot ang kanyang amo: 'Magaling! Isa kang mabuti at tapat na alipin! At dahil naging matapat ka sa kakaunting ipinagkatiwala sa iyo, ipapamahala ko sa iyo ang mas malaki pang halaga. Halika't makibahagi sa aking kaligayahan!'" MATEO 25:23

Ang iyong katapatan ay hindi lamang nakalulugod sa Diyos kundi inilalagay ka nito sa lugar na mapagkakatiwalaan ka pa ng mas marami. Pareho lang ang gantimpala sa dalawang alipin, kahit na ang isa ay binigyan ng 5,000 at ang isa, 2,000. Ang bawat isa ay kumayod ayon sa kanilang natanggap. Ano ang pinapalago ng Diyos sa atin kapag pinagkakatiwalaan Niya tayo ng mga biyayang iba-iba ang laki?
